



# ՎԵՐԱՊԱՏՐԱՍՏՎՈՂ ՈՒՍՈՒՑՉԻ ՀԵՏԱԶՈՏԱԿԱՆ ԱՇԽԱՏԱՆՔ

Հետազոտության թեման՝

ՈՒՍՈՒՑՉԻ ՀԱՄԱԳՈՐԾԱԿՑՈՒՄԸ ՍՈՎՈՐՈՂՆԵՐԻ ԾՆՈՂՆԵՐԻ ԿԱՄ  
ՆՐԱՆՑ ՕՐԻՆԱԿԱՆ ՆԵՐԿԱՅԱՑՈՒՑԻՉՆԵՐԻ ՀԵՏ ՍՈՎՈՐՈՂՆԵՐԻ  
ԿՐԹՈՒԹՅԱՆ ԿԱԶՄԱԿԵՐՊՄԱՆ ԵՎ ԸՆՏԱՆԵԿԱՆ  
ԴԱՍՏԻԱՐԱԿՈՒԹՅԱՆ ՀԱՐՑԵՐՈՒՄ

Սարգսյան Միրան

Հետազոտող ուսուցիչ՝ .....

*անուն, ազգանուն*

Զանֆիդայի միջնակարգ դպրոց

.....

*դպրոց*

Գևորգյան Կարինե

Մենթոր ուսուցիչ՝ \_\_\_\_\_

*անուն, ազգանուն*

## Բովանդակություն

Նախաբան .....	3
Հետազոտական համատեքստ .....	4
Գործնական համատեքստ .....	12
Ամփոփում .....	15
Գրականություն .....	16

## Նախաբան

Ընտանիքում երեխան ստանում է կյանքի առաջին փորձը, կատարում է առաջին դիտարկումները և սովորում է իրեն պահել կյանքի տարբեր իրավիճակներում, իսկ յուրահասակությունը կայանում է նրանում, որ մի քանի մարդիկ ամենասերտ կերպով համագործակցում են երկար ժամանակով, որը ձգվում է տասնյակ տարիներ կամ մարդկային կյանք: Երբ ծնող-երեխա հարաբերությունները շաղախված են օտարման, փոխազդեցությունից խուսափելու ձգտումով, այն բացասաբար է ազդում երեխայի անձի, նրա հոգեկան աշխարհի ձևավորման վրա: Երեխայի հետազոտման, լավագույն որակների, հատկությունների բացահայտման ու զարգացման հարցերում դպրոցի և ընտանիքի փոխներգործության շարժառիթը ընդհանուր հետաքրքրություններն են: Այդպիսի փոխհարաբերությունների հիմքում միմյանց նկատմամբ վստահության, փոխադարձ հարգանքի, փոխօգնության և օժանդակության, համբերատարության սկզբունքներն են: Դրանք օգնում են ուսուցիչներին և ծնողներին կամ օրինական ներկայացուցիչներին համատեղ ջանքերով դպրոցականների ինքնակառավարման, խոչընդոտների ու դժվարությունների հաղթահարման համար անհրաժեշտ որակների ու հատկությունների ձևավորման պայմաններ ստեղծել: Երեխաներին, ծնողներին և ուսուցիչներին միավորում են ընդհանուր մտահոգություններն ու խնդիրները, որոնց լուծումներն էապես պայմանավորված են փոխներգործության և համագործակցության բնույթով: Դպրոցի և ընտանիքի համագործակցությունը նպատակասլաց և երկարատև աշխատանք է, որն ամենից առաջ ենթադրում է երեխայի ընտանիքի, ընտանեկան դաստիարակության յուրահասակությունների բազմակողմանի և համակարգված ուսումնասիրություն: Այդ երկու ինստիտուտների համագործակցությունը և փոխներգործությունը մանկավարժական գործընթացի բոլոր փուլերում պետք է կազմակերպվեն պլանավորված ու համակարգված ձևով: Ծնողները և ուսուցիչները նույն երեխաների դաստիարակներն են: Հետևաբար դաստիարակությունն արդյունավետ կլինի միայն նրանց համագործակցության պայմաններում, երբ ձևավորվեն դաստիարակության գործընթացի միասնական նպատակներ, ձգտումներ, համատեղ ուժերով դրանց լուծման ուղիները, ինչով էլ պայմանավորված հետազոտության մեր թեմայի արդիականությունը:

## Գրականության ակնարկ

Ժամանակակից հասարակության մեջ դաստիարակության հիմնական ինստիտուտներից մեկն ընտանիքն է: Յուրաքանչյուր մարդու կյանքում ընտանիքը հատուկ տեղ է զբաղեցնում: Այն փորձը, որը նա ստանում է ընտանիքում, պահպանում է ողջ կյանքի ընթացքում, այնպես որ մեծանալով երեխաներն իրենց ընտանիքում կրկնում են ծնողների վարքը: Ընտանիքում է տեղի ունենում անձի նախնական սոցիալականացումը, յուրացվում են առաջին սոցիալական դերերը, սահմանվում են կյանքի հիմնական արժեքները, դիրքորոշումները, վարքագծային նորմերը, ձևավորվում երեխայի վերաբերմունքն իր և շրջապատի մարդկանց նկատմամբ: Ընտանիքը կարող է լինել անհատի զարգացման և էմոցիոնալ-հոգեբանական աջակցության աղբյուրը կամ դառնալ հոգեբանական վնասվածքների, անձի խանգարումների, հոգեսոմատիկ հիվանդությունների, ներոզների, վարքի շեղումների աղբյուր: Ընտանիքի՝ որպես դաստիարակության ինստիտուտի կարևորությունը պայմանավորված է նրանով, որ երեխան ընտանիքում է անցկացնում իր կյանքի զգալի մասը, և անձի վրա իր ազդեցության տևողությամբ կրթության սոցիալական ինստիտուտներից ոչ մեկը չի կարող համեմատվել ընտանիքի հետ (Алексеева Л.С., Плотник М.М., Спиваковская А.С., Ширинский В.И. Влияние внутрисемейных отношений на формирование личности ребенка. – Вып. 1. – М.: ЦБКТИ Минсоцзащиты населения Российской Федерации, 1995. – 40 с.):

Ծնողների և երեխաների փոխհարաբերությունների խնդիրներով զբաղվել են ռուս հեղինակներ Ա. Գ.Կովալևը, Բ.Լևին, Վ.Լ.Տիտարենկոն, Ն.Կոնը, ինչպես նաև արտասահմանյան հոգեբաններ Յ.Կորչակը, Դ.Սպոկը, Կ.Ռոսը, Վ.Սատիրը, Ա.Դելա Տորեն: Ծնողների և երեխաների փոխհարաբերությունների վերաբերյալ արժեքավոր տեղեկություններ են պարունակում ռուս դասականներ Ա.Ա.Բոդալևի, Լ.Ի.Բոժովիչի, Լ.Ս.Վիգոտսկու, Ա.Ս.Սպիվակովսկայայի, Ա.Յ.Վարգայի, Վ.Վ.Ստոլինի, Ա.Վ.Դոբրովիչի, Դ.Բ.Էլկոնինի աշխատությունները, որոնք արտացոլում են երեխայի հոգեբանական զարգացման, մանկության բնույթի և տարիքային շրջաբաժանումների ընդհանուր օրինաչափությունները:

Գրականության վերլուծությունը ցույց է տալիս, որ երեխայի անձի կայացման գործում մեծ նշանակություն ունի ընտանեկան դաստիարակության ոճը: Ընտանեկան դաստիարակության ոճը երեխայի նկատմամբ ծնողների հարաբերությունների ձևն է, նրա վրա ազդեցության որոշակի մեթոդների և հնարների կիրառումը, որոնք արտահայտվում են երեխայի նկատմամբ վերաբերմունքի և նրա հետ խոսքային ու ոչ խոսքային փոխազդեցության յուրօրինակ ոճով (Добрович А. Б. Воспитателю о психологии и психогигиене общения. М.: Просвещение. 1987 г. - 207 с.): Ընտանիքում ցանկացած աններդաշնակություն հանգեցնում է երեխայի անձի զարգացման բացասական հետևանքների, նրա վարքագծի խնդիրների: Կան ընտանեկան դաստիարակության ոճերի մի քանի տարբեր դասակարգումներ: Ավելի հաճախ ընդունվում է ամերիկացի հոգեբան Դիանա Բաումրիինդի դասակարգումը՝ ժողովրդավարական, ավտորիտար, անտարբեր, լիբերալ (Кузьмишина Т.Л., Амелина Е.С., Пермякова А.А., Хохлова Е.А. Стили семейного воспитания: отечественная и зарубежная классификация / Т.Л.Кузьмишина. – М., 2014. – С. 16 - 25.): Հայրենական և արտասահմանյան հոգեբանության մեջ լայնորեն տարածված են այն աշխատանքները, որոնք նկարագրում են ընտանեկան դաստիարակության տիպերի, ոճերի բազմազանությունը: Այս առումով գրեթե անհնար է առանձացնել ընտանեկան դաստիարակության ոճերի միասնական մեկ դասակարգում:

**Ավտորիտար (թելադրող) ոճ** - ծնողները ճնշում են երեխայի նախաձեռնությունը, կայացնում նրա կյանքի կարևոր որոշումները, սահմանափակում ինքնուրույնությունը, չեն հիմնավորում իրենց պահանջները, խիստ վերահսկում են, օգտագործում արգելքներ, նկատողություններ և ֆիզիկական պատիժներ, երեխայից պահանջում են ձեռքբերումներ, ներխուժում են անձնական տարածք: Ծնողների ավտորիտարիզմը դեռահասության տարիքում լուրջ խնդիրներ կառաջացնի (Антропов Ю.Ф. Психосоматические расстройства и патологические привычные действия у детей и подростков / Ю.Ф.Антропов, Ю.С.Шевченко. – М.: Издательство Института Психотерапии, Издательство НГМА, 2001. - 320 с.): Երեխաների արձագանքը կարող է տարբեր լինել: Ակտիվ և ուժեղ դեռահասները դիմադրում են ծնողների ճնշմանը, կոնֆլիկտներ ստեղծում, պաշտպանում իրենց դիրքորոշումը, ազդեցիվություն են

ցուցաբերում, սկսում ապստամբել, կարող են փախչել տնից: Մյուսները լսում են ծնողներին, զիջում են և ենթարկվում, միշտ և ամեն ինչում ապավինում են ծնողներին: Նման դաստիարակության դեպքում երեխայի մոտ դեռահասության տարիքի ընթացքում ձևավորվում է թշնամանք, ագրեսիվություն, հակամարտություն, իշխելու ձգտում, ասելություն ծնողների նկատմամբ, խնդիրների լուծում միայն ուժով, կոպիտ, բռի վարքագիծ և վերաբերմունք ուրիշների նկատմամբ, կամ անվճռականություն, նյարդայնություն, անինքնավստահություն, երկչոտություն, իրենց տեսակետը պաշտպանելու անկարողություն, ինքնագնահատականի անկում, սեփական արժանապատվության կորստի զգացողություն: Դեռահասները դժվարանում են ադապտացվել հասարակության մեջ և շրջապատող աշխարհում: Դպրոցում նրանք դժվարանում են ընկերներ գտնել, կապ հաստատել ուսուցիչների հետ: Երեխաների դաստիարակության ավտորիտար (թելադրող) ոճի դեպքում ձևավորվում են միայն արտաքին վերահսկողության մեխանիզմները, և երբ դրսից պատժի սպառնալիքը վերանում է, դեռահասի վարքագիծը կարող է դառնալ անկառավարելի, հակահասարակական: Դաստիարակության ավտորիտար ոճը զրկում է երեխային հոգեկան մտերմությունից, ջերմությունից, սիրուց, քնքշանքից, հոգատարությունից, կարեկցանքից, երեխաների և ծնողների միջև վստահությունից, ինչը հանգեցնում է կասկածամտության, մշտական զգոնության և շրջապատի, նույնիսկ հարազատների հանդեպ թշնամանքի:

Դաստիարակության **ժողովրդավարական** (վստահության վրա հիմնված) ոճ - իրենց երեխաներին այս ոճով դաստիարակող ծնողները խրախուսում են նրանց նախաձեռնությունը, անձնական պատասխանատվությունը և ինքնուրույնությունը (Педагогическая психология: учеб. для студ. высш. учеб. заведений / Под ред. Н.В. Ключевой. – М.: из-во ВЛАДОС-ПРЕСС, 2003. – 400 с.): Արդյունքում երեխան դաստիարակվում է որպես ինքնուրույն, ինք-նատիպ անձնավորություն: Այս ոճը բնութագրվում է երեխայի ջերմ հուզական ընդունման և մեծահասակների վերահսկողության բարձր մակարդակով: Ծնողներն արտահայտում են իրենց սերը, բարյացակամությունը երեխային, ծնողների և երեխաների միջև կա փոխըմբռնում, ջերմ զգացմունքներ, հաճախակի բարեկա-մական շփում: Ծնողներն ուշադիր են

իրենց երեխայի նկատմամբ, զգացմունքային առումով աջակցում են նրան, ստեղծում սիրո և հոգատարության ընտանեկան մթնոլորտ: Դեռահասներն ընդգրկված են ընտանեկան խնդիրների քննարկման մեջ, լսում և քննարկում են ծնողների կարծիքն ու խորհուրդները, մասնակցում իրենց վերաբերվող որոշումների կայացմանը: Ծնողները երեխաներից պահանջում են դրսևորել պատասխանատու, իմաստավորված վարքագիծ, կարգապահության կատարման մեջ ամրություն և հետևողականություն, որը ձևավորում է ճիշտ, պատասխանատու սոցիալական վարք: Դեռահասը զգում է իր կարևորությունն ընտանիքում: Այս վերաբերմունքը ձևավորում է դեռահասի կարգապահ, իր արարքների համար պատասխանատու, ակտիվ կյանքի դիրքորոշում, ինքնա-գնահատական, ինքնավստահություն, սեփական արժանապատվության զգացում, նախաձեռնողականություն և նպատակասլացություն, հետաքրքրասիրություն, աճում է անկախ, համարժեք ինքնագնահատական: Այդ պայմաններում դաստիարակված երեխաները կարող են վերահսկել իրենց վարքը, ցանկությունները, պահպանել կարգապահություն: Ձևավորվում է փոխզիջումային լուծումներ գտնելու, պայմա-նավորվելու, շրջապատի կարծիքի հետ հաշվի նստելու ունակություն: Նրանք լավ են սովորում դպրոցում, ավելի քիչ են ենթարկվում հասակակիցների բացասական ազդեցությանը, կարողանում են հարաբերություններ հաստատել և պահպանել մարդկանց հետ: Դպրոցում նման դեռահասներն ուսուցիչների հետ կոնֆլիկտներ չեն ունենում, քանի որ նա հասկանում է իր պարտականությունները և սովորում է կատարել դրանք: Դեռահասները գիտեն, որ ծնողները միշտ կլսեն և կօգնեն նրան: Ծնողները շփման մեջ օգտագործում են համոզելու, քննարկումների, փոխզիջման, փաստարկների մեթոդները: Նման ընտանիքում չկան ֆիզիկական պատիժներ և խոսքային ագրեսիա:

1. Դաստիարակության **լիբերալ** կամ թույլատրող ոճի դեպքում ծնողը երեխային «ազատություն», ինքնուրույնություն և անկաշկանդություն է տալիս, թույլ է տալիս նրան անել այն, ինչ նա ուզում է, ոչինչ չի սահմանափակում: Նա չի հասկանում «պետք է» բառը և ծնողների պահանջները չի լսում (Шнейдер Л.Б. Семейная психология: учебное пособие для вузов / Л.Б.Шнейдер - Изд. 2-е. М.: Академический Проспект; Екатеринбург: Деловая книга, 2006, - 768 с.): Ինքնահաստատման համար

երեխան օգտագործում է քահանայները, պահանջները, ցուցադրաբար վիրավորվում է: Ծնողն ընտրում է չմիջամտելու մարտավարությունը, չի օգնում դեռահասին և չի խանգարում, մասնակցություն չի ունենում անձի կայացման գործընթացին: Հարաբերությունները սառն են, հեռավորության վրա, օտարացած, բացակայում է վստահությունը, հուզական կապը: Երեխայի հետ շփումը կառուցվում է ամենաթողության և ցածր կարգապահության սկզբունքի վրա, բնորոշ է երեխային ուղղորդելու անկարողությունը կամ դժկամությունը: Դեռահասության տարիներին նման երեխաները հաճախ կոնֆլիկտում են նրանց հետ, ովքեր իրենց պահանջներ են ներկայացնում: Դպրոցում խնդիրներ են ունենում հասակակիցների և ուսուցիչների հետ, քանի որ նրանք սովոր չեն կատարել մեծահասակների պահանջները, զիջել, հնազանդվել ավագներին, հետևել օրենքներին և կանոններին: Ինչի պատճառով երեխան մեծանում է եսասեր, կոնֆլիկտային, մշտապես դժգոհ է շրջապատից, ինչը թույլ չի տալիս նրան նորմալ հարաբերություններ կառուցել հասակակիցների հետ: Ի վիճակի չէ մտերմության և ջերմության, ցանկություն չունի հոգ տանել, օգնել, աջակցել ինչ որ մեկին: Դրսևորվում է կոպտություն և ամենաթողություն, զողություն, ստախոսություն, անկարգություն, անպատասխանատվություն, խոստումը պահելու անկարողություն: Ընտանիքի կողմից վերահսկողության բացակայությունը հանգեցնում է այն բանին, որ դեռահասն ընդգրկվում է հակասոցիալական խմբերում, քանի որ նրա մոտ չեն ձևավորվել հոգեբանական մեխանիզմները, որոնք անհրաժեշտ են հասարակության առաջ պատասխանատու վարքագծի համար: Ամենաթողության պայմաններում մեծացած դեռահասն ավելի է հակված հոգեբանական խնդիրների, ֆոբիաների, դեպրեսիաների: Նա չի սովորել վերահսկել իրեն և իր վարքագիծը, ի վիճակի չէ դիմակայել կյանքի մարտահրավերները Սեդրակյան Ս. Ընտանիքի հոգեբանություն, հեղինակային հրատարակություն, 2010, 456 էջ):

Ընտանեկան դաստիարակության քառսային ոճը միասնական մոտեցման բացակայությունն է, երբ երեխայի նկատմամբ հստակ կոնկրետ, որոշակի պահանջներ չկան և ծնողների միջև տարաձայնություններ են առաջանում դաստիարակչական միջոցների ընտրության վերաբերյալ (Антонов А.И. Социология семьи. Под ред. А.И.Антонова. М., МГУ, 2005, с. 47.): Ծնողական արձագանքի անկանխատեսելիութ-



յունը երեխային զրկում է կայունության զգացողությունից և առաջացնում է բարձր անհանգստություն, անվստահություն, իմպուլսիվություն, ներոտիկ, աֆեկտիվ բռնկումներ, ագրեսիվություն և անկառավարելիություն, հակասոցիալական վարքագիծ: Նման դաստիարակությամբ չի ձևավորվում ինքնատիրապետում և պատասխանատվության զգացում, դեռահասը տարբերվում է մակերեսային, անհասուն դատողություններով, ցածր ինքնագնահատականով: Նման դեռահասների մասին դպրոցում ասում են, որ նրանք անկառավարելի են: Նրանց համար շատ դժվար է ադապտացվել սոցիումի կյանքում, քանի որ գնահատականներում և վարքագծում նրանք հստակ, կոնկրետ կողմնորոշիչներ չունեն:

**Խնամող ոճ (գերխնամք)** – ծնողները ցանկանում են մշտապես գտնվել երեխայի կողքին, նրա համար լուծել բոլոր ծագող խնդիրները, ապրել նրա փոխարեն, զրկել նրան ինքնուրույնությունից ֆիզիկական, հոգեկան և սոցիալական զարգացման մեջ [16, էջ 19]: Ծնողները չափազանց շատ են հետևում երեխայի վարքագծին, անհանգրստանում, հոգում և խնամում, ինչով արգելակում են երեխայի նախաձեռնության դրսևորմանը, կամքի և ազատության ձևավորմանը, զրկում ինքնուրույնությունից, դաստիարակում հնազանդություն, անկամություն, անօգնականություն: Դաստիարակության խնամակալական ոճը մի կողմից հանգեցնում է դեռահասների մոտ սեփական նշանակությունը չափազանց մեծացնելու, մյուս կողմից՝ նրա մոտ տազնապի, անօգնականության, մանկամտության, լկտիության, ինքնավստահության ձևավորմանը, դեռահասը դառնում է նյարդային, վատ է կողմնորոշվում սոցիալական ոլորտում: Երեխաները մեծանում են հնազանդ, բայց իրենց հնարավորությունների ու ուժերի վրա անինքնավստահ, վախենում են սխալվել, ինչ-որ բան սխալ անել: Որոշ դեռահասներ ձգտում են դուրս գալ ծնողների չափից ավել վերահսկողությունից և խնամքից, ագրեսիա են ցուցաբերում, դառնում են անհնազանդ և ինքնակամ: Դժվարություններ են առաջանում հասակակիցների հետ փոխհարաբերություններում: Գերխնամքը, վերահսկողությունը, սահմանափակումները և արգելքները ձևավորում են անչափահասի գաղտնապահությունը, խորամանկելու, խաբելու ունակությունը: Նման դեռահասները կախված են ուրիշից, ինչպես նաև հեշտ են ընկնում ուրիշների բացասական ազդեցության տակ: Դեռահասները ինքնապաշտպանության համար

սկսում են ստել ծնողներին, ովքեր անընդհատ փորձում են վերահսկել իրենց, ինչը հանգեցնում է օտարման: Ծնողները փաստորեն անգիտակցաբար արգելակում են երեխայի մոտ տարբեր հմտությունների և ունակությունների ձևավորումը, նպատակին հասնելու հաստատակամության զարգացումը, աշխատասիրությունը:

Դաստիարակության **օտարված (ինդիֆերենտ)** ոճը ենթադրում է ծնողների կողմից անտարբերություն երեխայի անձի նկատմամբ (Добрович А. Б. Воспитателю о психологии и психогигиене общения. М.: Просвещение. 1987 г. - 207 с.): Ծնողները «չեն նկատում» երեխային, չեն հետաքրքրվում նրա զարգացմամբ և ներքին աշխարհով, չեն հետաքրքրվում դպրոցում անչափահասի գործերով, նրա անձնական կյանքով: Ակտիվորեն խուսափում են շփվել նրա հետ, պահում են նրան հեռավորության վրա, բացակայում է ջերմությունը երեխայի նկատմամբ, վերաբերվում են քամահրանքով, անտեսելով նրա հուզական կարիքները: Երեխաները թողնվում են իրենք իրենց: Այս ոճը հանդիպում է անբարեհաջող ընտանիքներում, որտեղ ծնողներն անտարբեր են և անհաղորդ իրենց երեխայի հանդեպ, որտեղ մեկ կամ երկու ծնողները չարաշահում են ակոհոլը կամ թմրանյութերը: Նման վերաբերմունքը դեռահասին դարձնում է դժբախտ, անինքնավստահ, միայնակ, փակ, նրա մոտ ձևավորվում է ագրեսիվություն, ուրիշների հանդեպ անվստահություն, զգացմունքային օտարվածություն, անհանգրստություն: Դեռահասները դառնում են կամ անպատասխանատու և անինքնավստահ, կամ հակառակ՝ անկառավարելի և իմպուլսիվ: Նրանք խուսափում են շփումից, չեն ձգտում հաստատել սոցիալական կապեր: Վտանգ կա դեռահասներին հակասոցիալական խմբերի մեջ ներգրավվելու: Նման դեռահասները մյուսներից ավելի հաճախ խնդիրներ են ունենում օրենքի հետ:

Դաստիարակության ոճերն ընտանիքում միշտ չէ, որ կարող են դրսևորվել մաքուր ձևով: Ծնողները տարբեր իրավիճակներում օգտագործում են տարբեր ոճեր: Ոճը փոփոխելը, անհետևողականությունը անբարենպաստ ազդեցություն է ունենում երեխայի վրա: Ընտանիքում անհրաժեշտ է սահմանել դաստիարակության երեխային հասկանալի, միասնական ոճ, հաշվի առնելով նրա կարիքները, պահանջմունքները և հնարավորությունները: Ընտանեկան դաստիարակության ոճն արտացոլում է ոչ

միայն ծնողական անձնային առանձնահատկությունները, նրանց դիրքերը, այլև երեխայի ձևավորվող ինքնությունը: Ընտանիքում ընտանեկան դաստիարակության ուժից է կախված երեխայի զարգացումը, նրա բնավորության այս կամ այն հատկանիշի ձևավորումը, վարքագծային մոդելները, ծնողների և մյուսների հետ փոխհարաբերությունների առանձնահատկությունները: Ընտանիքում և դաստիարակության մեջ ցանկացած աններդաշնակություն հանգեցնում է բացասական հետևանքների, վարքագծային խնդիրների: Անհնար է պատկերացնել որպես անձ մարդու գոյությունն առանց հասարակության: Շփումը մարդու սոցիալական կենսակերպի, գոյության էական պայմանն է: Սոցիալական փորձը և գործելակերպը վկայում են այն մասին, որ անձի լիակատար մեկուսացումը հասարակությունից, այլ մարդկանց հետ շփումից զրկելը հանգեցնում է մարդու սոցիալական հատկանիշների և հատկությունների կորստի: Ներկայումս նկատվում է դարերի ընթացքում ստեղծված, կայացած ընտանեկան արժեքների ոչնչացում: Դեռահասի ինքնագիտակցությունը ձևավորվում է առաջին հերթին ընտանեկան համակարգի ազդեցության ներքո: Եվ ընտանեկան դաստիարակության սխալները նշանակալի ազդեցություն ունեն անչափահասների վարքագծի հակաօրինական ձևերի զարգացման վրա:

## Գործնական համատեքստ

Ուզում եմ ներկայացնել սովորողի ընտանիքի, ծնողների կամ օրինական ներկայացուցիչների հետ իմ և մեր մանկավարժական կոլեկտիվի ուսուցիչների, մասնագետների համագործակցության եղանակները: Ուսուցիչների և ընտանիքի փոխներգործության բնույթը պայմանավորված է դպրոցի նկատմամբ ծնողների վերաբերմունքով, ինչպես նաև այն հանգամանքով, թե վերջիններս, ըստ իրենց իմացական կարողությունների, հայացքների, դիրքորոշումների, որտեղ են իրենց տեսնում դաստիարակության գործընթացում: Դպրոցի և ծնողների կամ օրինական ներկայացուցիչների հետ համագործակցության հիմքը խմբային ու անհատական աշխատանքի ձևերն են: Միաժամանակ կան հիմնախնդիրներ, որոնք մտահոգում են բոլոր ծնողներին կամ էլ կապված են դասարանում երեխաների դաստիարակության գործընթացի հետ: Այդպիսի հարցերը քննարկվում են ընդհանուր ժողովների ժամանակ: Ծնողական ժողովը ծնողների հետ աշխատանքի հիմնական ձևն է, որի միջոցով լուծվում են դասարանական ժողովների ժամանակ առաջացած խնդիրները, փոխներգործության կայացման առումով էական նշանակություն ունի ուսուցիչների շփման ոճը: Դպրոցի և ընտանիքի համագործակցության և փոխներգործության ամենաարդիական և պահանջված ուղղություններից մեկն այսօր երեխաների ծնողների կամ նրանց օրինական ներկայացուցիչների համար համար խորհրդատվությունների կազմակերպումն է:

Մանկավարժները և ծնողները ունեն ընդհանուր նպատակներ և առանց նրանց համագործակցության՝ երեխայի կյանքը լիարժեք չէ: Դպրոցը երեխային տալիս է գիտական գիտելիքներ և իրականության նկատմամբ դաստիարակում գիտակցական վերաբերմունք: Ընտանիքն էլ իր հերթին ապահովում է կյանքի պրակտիկ փորձը: Ընտանեկան կյանքի կարևոր հարցերից մեկն էլ երեխաների ճիշտ դաստիարակությունն է: Ծնողների սերը երեխայի զարգացման անհրաժեշտ կարևորագույն պայմանն է: Երբ երեխան իրեն մենակ ու լքված է զգում, ապա նրա մեջ չի կարող զարգանալ ինքնավստահություն ու հավատ: Ծնողները պետք է իմանան, որ երեխան, որը կյանքի առաջին տարիներին իսկական ջերմության վայելքը չի ապրել, ինքն էլ լիարժեք ծնող դառնալ չի կարող: Մարդը ուրիշներին

սիրել սովորում է իր ծնողներից: Ծնողներն ու ընտանիքի մյուս անդամներն գտնվում են երեխայի ուշադրության կենտրոնում: Հետևաբար՝ երեխայի դաստիարակության ընթացքում պետք է ուշադիր լինել:

Ծնողները պիտի ապահովեն երեխաների մտավոր, անձնային և հուզական զարգացում: Հարկավոր է նրանց հաղորդել հիմնական գիտելիքներ՝ աշխարհի և մարդկային հարաբերությունների, բարոյական արժեքների և նորմի վերաբերյալ: Երկու համերաշխ ծնողների ներկայությունը բարենպաստ պայմաններ է ստեղծում խնդիրների լուծման համար: Միասին գործելով՝ նրանք միմյանց հնարավորություն են տալիս աշխատել, զբաղվել ինքնակրթությամբ, մասնակցել հասարակական կյանքին: Այս ամենի համար հարկավոր է կարողանալ ճիշտ ընտրություն կատարել: Ընտանիքի հետ աշխատանքն անհրաժեշտ է կառուցել տարբերակված, չպարտադրել փոխներգործության միատեսակ ձևեր, այլ կողմնորոշվել դեպի ծնողների պահանջմունքները, ընտանիքի և ընտանեկան դաստիարակության յուրահատկությունները, ծնողներին աստիճանաբար ներգրավել դպրոցի, դասարանի և իր երեխայի գործերում: Իսկ դպրոցի և ծնողների համագործակցությունը շատ կարևոր է: Ծնողները պատրաստ են քննարկել բոլոր այն հարցերը, որոնք շոշափում են երեխաների հետաքրքրությունները: Դասողեկը մշակում է ծնողներին փոխանցվող հոգեբանամանկավարժական գիտելիքների համալիր, որը ենթադրում է ծնողների գործուն, ստեղծագործական մասնակցություն՝ հարցերի քննարկմանը, ուսումնական պարապմունքների կազմակերպման և անցկացման գործընթացներին: Ուսուցիչների և ծնողների փոխներգործության ակտիվ մեթոդներ կարող են լինել փորձի փոխանակման, հարց ու պատասխանի երեկոները, բանավեճերը, ուսուցիչների և մասնագետների (բժիշկներ, հոգեբաններ և այլն) հետ հանդիպումները:

Ուսուցիչների, դասղեկների կարևորագույն խնդիրներից են ընտանիքի միասնության ու համախմբվածության նախադրյալների ստեղծումը, ծնողներին երեխաների փոխըմբռնման մթնոլորտի, ընտանիքում երեխաների համար հարմարավետ միջավայրի նախապատրաստումը, նրանց համատեղ գործունեության և շփման հմտությունների ձևավորումը: Ուսուցիչն իրականացնում է նպատակապահ գործունեություն երեխաների և ծնողների միջև ներդաշնակ հարաբերությունների

ձևավորման ուղղությամբ, ստեղծում ծնողների կամ օրինական ներկայացուցիչների նկատմամբ հարգալից վերաբերմունքի մշակման իրավիճակներ: Ծնողների հետ համագործակցությունը դպրոցի կրթական նպատակների իրականացման և երեխաների կրթության առավել նպաստավոր պայմանների ու կրթական միջավայրի ստեղծման կարևոր նախադրյալ է: Ծնողների խորհրդատվությունն այսօր դպրոցի ու ընտանիքի համագործակցության ամենաարդիական և պահանջված ուղղությունն է: Ծնողների մեծամասնությունը ինքնակրթության համար ժամանակ չի ունենում: Սովորաբար խորհրդատվության համար դիմում են դպրոցին: Որպես կանոն, դա լինում է հատկապես ծայրահեղ իրավիճակներում՝ երեխայի վատ առաջադիմության կամ վարքի դրսևորման ժամանակ: Անհրաժեշտ է պահպանել փոխվստահության, փոխադարձ հարգանքի, խորհրդատվության նկատմամբ հետաքրքրությունների, կոմպետենտության, ծնողների միջավայրում խնդիրներն ինքնուրույն լուծելու դիրքորոշումների մշակման, խորհրդատվությունների որակի ապահովման սկզբունքները: Գաղտնիք չէ, որ երեխաների ծնողները զբաղված մարդիկ են: Ուստի խիստ կարևոր է, որ խորհրդատվությունը կազմակերպվի նաև ծնողներին հարմար ժամերի, որպեսզի հնարավորություն ունենան միաժամանակ այլ խնդիրներ լուծել: Դպրոցում պետք է լինի հանդուրժողականության և հյուրընկալ ջերմ մթնոլորտ, քանի որ դպրոցի ու ծնողի համագործակցությունն սկսվում է դպրոցի նախասրահից:

Ընտանիքում երեխաները նույնպես ունեն իրենց պարտականությունները և պատասխանատվությունը: Ուսուցիչ-ծնող փոխհարաբերությունները նպաստում են անհրաժեշտ գիտելիքների ձեռքբերմանը և անհատի արժեքային համակարգի ձևավորմանը: Հենց առաջին օրերից ամուր հիմքի վրա պետք է լինի ծնող-ուսուցիչ փոխհարաբերությունը. իրապես հարգելով և վստահելով ուսուցչին՝ ծնողը երեխայի մեջ հարգանք պիտի սերմանի դպրոցի ու կրթության նկատմամբ: Դժվարին և կարևոր պատասխանատվություն է կրում ուսուցչը: Նա իր ժողովրդի այն զինվորն է, որի զենքը գիտությունն է: Նա տիրապետում է մարդ դաստիարակելու արվեստին: Իր գործին նվիրված ուսուցչի ամբողջ կյանքն անցնում է սերունդներին կրթելու և դաստիարակելու նորանոր ուղիների որոնման մեջ:

## Ամփոփում

Այսպիսով, ուսուցչի պարտքն է՝ ճանաչել ու հասկանալ երեխաների ֆիզիկական և հոգեբանական վիճակները, պաշտպանել նրանց՝ դպրոցական կյանքի բոլոր իրավիճակներում: Այս գործոնները երեխաներին կհաղորդեն պաշտպանվածության զգացում և ինքնավստահություն, կստեղծեն ստեղծագործական ակտիվություն ու լիարժեք զարգացում: Մանկավարժության նվաճումը առկա հիմնախնդիրների գործնական լուծումների իրագործման արդյունավետ փորձերն են: Դաստիարակչական ներգործությունը պետք է ուղեկցվի ընտանեկան դաստիարակության սերտ համագործակցությամբ: Հակառակ դեպքում դրական արդյունք չենք կարող տալ: Դպրոցում դաստիարակությունն ընթանում է մի շարք ուղղություններով՝ ուսուցում, գնահատում և հասակակիցների հետ փոխադարձ շփումների կարգավորում:

Դպրոցական ուսուցումը նպաստում է այնպիսի որակների ձևավորմանը, ինչպիսիք են հետաքրքրասիրությունը, ուշադրությունը, պահանջկոտությունը և բնավորության մի շարք այլ գծեր: Դաստիարակչական աշխատանքը հիմնականում նպաստում է երեխայի ճանաչողական հետաքրքրությունների, ինքնակրթության, ինքնազարգացման պահանջմունքների ձևավորմանը: Դպրոցի մանկավարժական մեթոդների հիմքում ընկած են երեխայի ազատ մտածողության, վերլուծական, ստեղծագործական մտածողության, տրամաբանության, ինչպես նաև կողմնորոշվելու ունակության զարացումը: Կրթության բնագավառում պետական քաղաքականության հիմքն ազգային դպրոցն է, որի գլխավոր նպատակը մասնագիտական պատշաճ պատրաստվածություն ունեցող և համակողմանիորեն զարգացած, հայրենասիրության, պետականության և մարդասիրության ոգով դաստիարակված անձի ձևավորումն է, որի նպատակով ուսուցիչը և դպրոցը համագործակցում են ծնողի կամ երեխայի օրինական ներկայացուցիչների հետ սովորողների կրթության և ընտանեկան դաստիարակության հարցերով:

Ժամանակի մեծ մտավորականներից մեկն ասել է. «Ուսուցիչն աշխատում է ամենապատասխանատու խնդրի վրա. նա ձևավորում է մարդուն»:

## Գրականություն

2. Սեդրակյան Ս. Ընտանիքի հոգեբանություն, հեղինակային հրատարակություն, 2010, 456 էջ:
3. Алексеева Л.С., Плотник М.М., Спиваковская А.С., Ширинский В.И. Влияние внутрисемейных отношений на формирование личности ребенка. – Вып. 1. – М.: ЦБКТИ Минсоцзащиты населения Российской Федерации, 1995. – 40 с.
4. Антонов А.И. Социология семьи. Под ред. А.И.Антонова. М., МГУ, 2005, с. 47.
5. Антропов Ю.Ф. Психосоматические расстройства и патологические привычные действия у детей и подростков / Ю.Ф.Антропов, Ю.С.Шевченко. – М.: Издательство Института Психотерапии, Издательство НГМА, 2001. - 320 с.
6. Добрович А. Б. Воспитателю о психологии и психогигиене общения. М.: Просвещение. 1987 г. - 207 с.
7. Кузьмишина Т.Л., Амелина Е.С., Пермякова А.А., Хохлова Е.А. Стили семейного воспитания: отечественная и зарубежная классификация / Т.Л.Кузьмишина. – М., 2014. – С. 16 - 25.
8. Педагогическая психология: учеб. для студ. высш. учеб. заведений / Под ред. Н.В. Ключевой. – М.: из-во ВЛАДОС-ПРЕСС, 2003. – 400 с.
9. Шнейдер Л.Б. Семейная психология: учебное пособие для вузов / Л.Б.Шнейдер - Изд. 2-е. М.: Академический Проспект; Екатеринбург: Деловая книга, 2006, - 768 с.